



---

Trg pravde 10, 76100 Brčko distrikt Bosne i Hercegovine; tel: 049/217-955; fax: 049/235-070; mail: pkbd@pkbd.ba  
Трг правде 10, 76100 Брчко дистрикт Босне и Херцеговине; тел: 049/217-955; факс: 049/235-070; е-пошта: pkbd@pkbd.ba

Broj: SuPK-03-1199/21  
Brčko, 06.09.2021. godine.

Na osnovu člana 71 Statuta Brčko distrikta Bosne i Hercegovine – prečišćen tekst (Službeni glasnik Brčko distrikta BiH, broj 2/10), člana 14. Zakona o Pravosudnoj komisiji Brčko distrikta Bosne i Hercegovine (Službeni glasnik Brčko distrikta Bosne i Hercegovine, broj 19/07, 20/07, 02/08, 04/21 i 06/21), člana 9. stav 5. Zakona o zaštiti od požara Brčko distrikt BiH („Službeni glasnik Brčko distrikta Bosne i Hercegovine“, broj: 9/06, 19/07 i 12/11), Pravosudna komisija Brčko distrikta BiH na 228 redovnoj sjednici održanoj dana 06.09.2021. godine, donosi sljedeći:

## PRAVILNIK O ZAŠTITI OD POŽARA U PRAVOSUĐU BRČKO DISTRIKTA BIH

### I - OPŠTE ODREDBE

#### Član 1.

- (1) Pravilnikom o zaštiti od požara (u daljem tekstu: Pravilnik) propisuje se organizacija, postupak i mjere zaštite od požara u pravosuđu Brčko distrikta Bosne i Hercegovine (u daljem tekstu: pravosuđe).
- (2) Pravosuđe u smislu ovog Pravilnika čine pravosudne institucije Brčko distrikta i to: Pravosudna komisija, Apelacioni sud, Osnovni sud, Tužilaštvo, Kancelarija za pravnu pomoć i Pravobranilaštvo.

#### Član 2.

(1) Zaštita od požara obuhvata skup mjera i radnji upravne, organizacione, tehničke, obrazovne i propagandne prirode, koje se preduzimaju u cilju sprečavanja izbijanja i širenja požara, njegovog otkrivanja i gašenja, te spašavanja ljudi i materijalnih dobara ugroženih požarom. Zaštita od požara organizuje se i sprovodi u svim mjestima i na svim objektima koji su izloženi opasnostima od izbijanja i širenja požara.

#### Član 3.

(1) Zaposleni obezbjeđuju zaštitu od požara obavljajući poslove na radnom mjestu na način i postupkom utvrđenim ovim Pravilnikom, te stručnim uputstvima i prema vlastitoj procjeni trenutnih prilika.

#### Član 4.

(1) Zaposleni u pravosudnim institucijama, kao i druga lica koja se nađu u krugu pravosudnih institucija, dužni su se pridržavati odredbi ovog Pravilnika kao i upozoravajućih natpisa koji su istaknuti na vidnim mjestima u objektima pravosudne institucije

#### Član 5.

(1) Zaštita od požara je djelatnost od posebnog za Brčko distrikt Bosne i Hercegovine.

#### Član 6.

(1) Zaposleni u pravosudnim institucijama dužni su da učestvuju u gašenju požara i spašavanju ljudi i materijalnih dobara, a pravosudna institucija je obavezna da stavi na raspolaganje sva sredstva potrebna za uspješno i efikasno gašenje i lokalizovanje požara i spašavanje ljudi i materijalnih dobara u pravosudnim institucijama i dobara drugih pravnih i fizičkih subjekata.

#### Član 7.

(1) Projektanti građevinskih objekata, uređaja, adaptacija i rekonstrukcija u pravosudnoj instituciji i za potrebe pravosudne institucije, kao izvođači radova na tim objektima, dužni su pri projektovanju i izvođenju radova da primjenjuju propisane mjere i normative zaštite od požara.

## II - ORGANIZOVANJE ZAŠTITE OD POŽARA U PRAVOSUDNIM INSTITUCIJAMA

#### Član 8.

(1) Pravosudna institucija je dužna da u sprovođenju mjera zaštite od požara postupa u skladu sa zakonom, planovima zaštite od požara i opštim aktima pravosudne institucije i drugih pravnih lica, državnih i drugih organa i preduzetnika.

(2) Stručne poslove zaštite od požara u pravosudnim institucijama vrši odgovorno lice zaštite na radu i zaštite od požara ili ovlaštena organizacija.

#### Član 9.

(1) Unutrašnju kontrolu i stabilnost zaštite od požara vrši ovlaštena organizacija.

#### Član 10.

(1) Unutrašnja kontrola se organizuje u pravosudnoj instituciji sa ciljem kontrole, usmjeravanja i provođenja zaštite od požara koje su utvrđene Zakonom o zaštiti od požara Brčko distrikt BiH i ovim Pravilnikom.

#### Član 11.

(1) Unutrašnja kontrola obuhvata:

- a) Periodični pregled i ispitivanje električnih uređaja i instalacija, zamjene dotrajalih i neispravnih dijelova kao i popravak oštećenih uređaja i instalacija;

- b) Kontrolu i uskladištenje eksplozivnih sredstava, lako zapaljivih tečnosti i zapaljivih materijala;
- c) Stavljanje znaka upozorenja na opasnim mjestima, zabrana pušenja i paljenja vatre na opasnim mjestima;
- d) Kontrola čistoće u prostorijama i redovno odstranjivanje lako zapaljivih otpadaka i ambalaže;
- e) Kontrola skladišta robe i drugih materijala u pogledu zaštite od požara;
- f) Kontrola sistema i sredstva vatrodojave;
- g) Kontrolu sredstava i opreme za gašenje požara.

#### Član 12.

(1) O izvršenoj kontroli stanja zaštite od požara sastavlja se zapisnik u koji se unosi nađeno stanje u pogledu primjenjenih propisa mjera zaštite od požara, koji potpisuju lica koja su izvršila kontrolu te isti dostavljaju rukovodiocu pravosudne institucije.

(2) Ako se utvrdi da u pravosudnoj instituciji i nisu u potpunosti provedene propisane mjere zaštite od požara, rukovodilac pravosudne institucije će odrediti rok da se otklone uočeni nedostaci.

#### Član 13.

(1) Pravosudna institucija polazeći od svojih uslova i potreba, a u skladu sa propisima o zaštiti od požara, utvrdiće opštim aktom naročito:

- a) radna uputstva koja moraju sadržavati mjere zaštite od požara za sve radne jedinice gde postoji opasnost od požara, uz bližu razradu obaveza prema radnom uputstvu i drugim propisima svakog pojedinog zaposlenika u pogledu kontrole i sprovođenja propisa iz oblasti zaštite od požara;
- b) način vršenja unutrašnje kontrole sprovođenja zaštite od požara, te dužnosti, odgovornosti i ovlašćenja zaposlenika koji tu kontrolu neposredno vrše;
- c) postupak i način upoznavanja zaposlenika prilikom stupanja na rad ili raspoređivanja na drugo radno mjesto sa opasnostima od požara vezanim za to radno mjesto, kao i način obučavanja zaposlenika u rukovanju sredstvima i opremom za gašenje požara;
- d) prostorije, prostore i mjesta na kojima se ne smije proizvoditi, koristiti ili prenositi otvorena vatra;
- e) vrstu i količinu opreme i sredstava za gašenje požara, raspored opreme i sredstava kao i vrijeme povremenog ispitivanja njihove ispravnosti;
- f) zadatke i odgovornosti rukovodećih zaposlenika u vezi sa sprovođenjem zaštite od požara;
- g) odgovornost zaposlenika zbog nepridržavanja propisanih mjera zaštite od požara;
- h) dužnosti i ponašanje zaposlenika u slučaju izbijanja požara;

#### Član 14.

(1) Rukovodilac pravosudne institucije, rukovodeći službenici i službenici sa posebnim ovlaštenjima u pravosudnoj instituciji, svaki u svom djelokrugu, odgovorni su za organizovanje i sprovođenje zaštite od požara, naročito za primjenu propisanih i naloženih mjera, održavanje u

ispravnom stanju i namjensku upotrebu opreme i sredstava za gašenje požara, kao i za upoznavanje zaposlenicima sa opasnostima od požara vezanim za njihove poslove i zadatke.

(2) O izvršenim ispitivanjima i pregledima vodi se evidencija koja sadrži identifikacioni broj aparata, ime zaposlenika koji vrši ispitivanje i datum ispitivanja.

#### Član 15.

(1) U organizovanju i sprovođenju, odnosno unapređenju zaštite od požara, rukovodilac pravosudne institucije ima slijedeća prava i dužnosti:

- Organizuje i nadzire primjenu normativnih akata i propisa iz oblasti zaštite od požara,
- odgovoran je za pravovremenu izradu i primjenu Plana zaštite od požara;
- utvrđuje način vršenja unutrašnje kontrole sprovođenja zaštite od požara, te dužnosti, odgovornosti i ovlaštenja zaposlenih koji tu kontrolu neposredno vrše;
- pokreće postupak za utvrđivanje disciplinske odgovornosti za povredu radne obaveze protiv zaposlenih koji je učinio povredu radne dužnosti u vezi sa zaštitom od požara i to u slučajevima kad se zaposleniku treba da izrekne disciplinska kazna prestanak radnog odnosa;
- obavlja i druge poslove iz oblasti zaštite od požara koji su utvrđeni pozitivnim pravnim propisima.

#### Član 16.

(1) Ovlaštena organizacija koji obavlja poslove zaštite od požara dužna je da obavlja sledeće:

- izučava požarne opasnosti u svim poslovnim prostorijama, a naročito u objektima u kojima se nalaze lako zapaljive stvari, te druge opasnosti koje proističu iz procesa rada, izrađuje analize, informacije i izvještaje o stanju i problemima u oblasti zaštite od požara, te iste dostavlja nadležnim u pravosudnoj instituciji,
- izrađuje bliža uputstva i upozorenja za objekte gdje se drže, uskladištavaju ili manipuliše sa vatrogasnim materijama,
- učestvuje u izradi prijedloga Pravilnika o zaštiti od požara i Plana zaštite od požara,
- priprema nastavne planove i programe stručnog osposobljavanja zaposlenih iz oblasti zaštite od požara,
- neposredno učestvuje u osposobljavanju zaposlenih iz oblasti zaštite od požara,
- vodi potrebnu evidenciju iz oblasti zaštite od požara,
- redovno vrši preglede poslovnih prostorija, a najmanje jedanput u tri mjeseca radi utvrđivanja eventualnih nedostataka i otklanjanja istih koji bi mogli biti uzročnik požara,
- obavlja i druge poslove iz oblasti zaštite od požara.

### III - DUŽNOSTI I ODGOVORNOSTI ZAPOSLENIH U SLUČAJU IZBIJANJA POŽARA I NJIHOVO UČEŠĆE U GAŠENJU POŽARA

#### Član 17.

(1) Zaposleni u pravosudnoj instituciji dužni su:

- da se na svojim radnim mjestima i organizacionim jedinicama upoznaju sa požarnim opasnostima, mjerama i sredstvima za zaštitu od požara, postupcima i dužnostima u slučaju požara i materijalnom odgovornosti i da obavezno poštuju i sprovode sve mjere zaštite od požara utvrđene Zakonom i Pravilnikom zaštite od požara;
- da se staraju o ispravnosti ručnih vatrogasnih aparata za gašenje požara i drugih sredstava, kao i da se staraju da sredstva za gašenje požara uvijek budu na određenim mjestima i da je omogućen pristup istim;
- da nakon svake upotrebe ili aktiviranja aparata za gašenje požara, hidrantske mreže i drugih sredstava i opreme to prijave svom neposrednom rukovodiocu;
- da poštuju istaknuto upozorenje i znakove zabrane i traže da se tako ponašaju i drugi zaposlenici i lica koja se po bilo kom osnovu nađu u poslovnim prostorijama;
- da po završetku rada na radnom mjestu, odnosno poslu, provjere i otklone sve eventualne opasnosti, odnosno izvore i uzročnike požara koji bi mogli izazvati požar ili eksploziju, a ako to nisu sami u mogućnosti otkloniti dužni su o tome obavjestiti svog neposrednog rukovodioca.

#### Član 18.

(1) Zaposlenik koji primjeti požar dužan je da ga ugasi ako to može učiniti bez opasnosti za sebe ili drugog, odstrani lako zapaljive stvari i preduzme druge potrebne radnje u cilju sprečavanja širenja požara i njegove lokalizacije.

#### Član 19.

(1) Ako zaposlenik ne može ugaziti požar dužan je da o nastalom požaru odmah obavijesti vatrogasnu jedinicu, rukovodioca pravosudne institucije, neposredno pretpostavljenog i druge zaposlene koji se nalaze u krugu pravosudne institucije.

#### Član 20.

(1) U cilju dojave požara, odnosno uzbuđivanja, na vidnim mjestima u objektima pravosudne institucije moraju se istaći telefonski brojevi vatrogasnih društava, zdravstvene ustanove i Policije Brčko Distrikta.

#### Član 21.

(1) Prilikom obavješćavanja o požaru, potrebno je vatrogasnim društvima javiti:

- a) mjesto gdje je požar izbio
- b) obim požara, odnosno stepen opasnosti
- c) da li ima povrijeđenih
- d) ime i prezime zaposlenika koji javlja požar, te broj telefona sa kojeg poziva.

## Član 22.

(1) Radi efikasnog i nesmetanog gašenja požara i spasavanja ljudi i materijalnih dobara rukovodilac akcije gašenja požara iz vatrogasnog društva može da naredi:

- da zabrani pristup nepozvanim licima u blizini mjesta požara, kao i saobraćaj pored mjesta požara;
- da naredi evakuaciju ljudi i uklanjanje stvari iz susjednih objekata koji su ugroženi požarom, kao i da preduzme mjere za obezbjeđivanje stvari koje su evakuisane;
- da naredi prekid dovođenja električne energije, gasa ili drugog energeta;
- da naredi djelimično ili potpuno rušenje objekta preko koga bi se požar mogao proširiti, ako se širenje požara ne može na drugi način da spriječi;
- da ograniči djelimično ili potpuno prekine dovod vode struje potrošačima u zoni u kojoj se pojavio požar ili čitavom naselju radi obezbjeđenja potrebne količine vode za gašenje požara;
- da naredi korišćenje vode iz obližnjeg bunara, cisterni, bazena, rezervoara, kanala i slično, a koji pripadaju ili društvu ili drugim pravnim licima, organima, organizacijama, samostalnim radnjama i privrednicima i privatnicima;
- da naredi korišćenje vozila pravosudne institucije ili drugih pravnih lica, preduzetnika kao i pojedinaca radi prevoženja nastradalih u požaru do najbliže zdravstvene ustanove;
- da naredi upotrebu opreme i sredstava koja su u vlasništvu preduzeća, drugih pravnih lica, preduzetnika a koja bi prema procjeni bila potrebna u akciji gašenja i spasavanja;
- da nasilno otvori zaključani objekat ili prostoriju radi gašenja požara i spasavanja ljudi i materijalnih dobara a po završetku intervencije obezbijedi objekat do dolaska policije ili vlasnika objekta ;
- da naredi licima koja žive u neposrednoj blizini mjesta požara, kao i licima koja se zateknu u neposrednoj blizini mjesta požara, da pruže pomoć u gašenju požara i spasavanju ljudi i materijalnih dobara;
- da naredi uporebu javne sirene radi bržeg okupljanja vatrogasaca.

## Član 23.

(1) Do dolaska pozvane vatrogasne jedinice na mjesto požara, prisutni zaposlenici dužni su organizovati gašenje nastalog požara, a posebno trebaju učiniti slijedeće:

- Organizovati spasavanje eventualno ugroženih zaposlenih i drugih lica,
- Organizovati evakuaciju iz ugrožene zone: lako zapaljivih i eksplozivnih materija, otrovnih i vatroopasnih materija, materijala od izuzetne vrijednosti, vrijednosnih papira, novca, tehničke i druge dokumentacije, važnijih mašina i uređaja, te motornih vozila.
- Obezbjediti isključenje struje u objektu pravosudne institucije,
- Zatvoriti odgovarajuća vrata, prozore, ventilacione i druge otvore da se spriječi širenje požara,
- Obezbjediti na licu mjesta prisustvo odgovarajućih stručnih radnika (električar, bravar i dr.) koja mogu biti od koristi u akciji gašenja požara.
- Nasilno otvaranje objekata, skladišta i kapija ako je to u interesu akcije gašenja i spašavanja ljudi i imovine,
- Poduzeti i druge mjere zavisno od date situacije.

#### Član 24.

(1) Zaposlenik koji ne preduzme mjere za gašenje požara čini težu povredu radne obaveze.

#### Član 25.

(1) Svaki zaposlenik odgovoran je ako ne pristupi gašenju požara ili ako napusti akciju gašenja požara prije nego s isti potpuno ugasi. Zaposlenik je naročito odgovoran ako:

- ne sprovodi propisane mjere zaštite od požara u određenom roku, a i ako usljed toga nisu nastupile štetne posljedice;
- ne pridržava se propisanih upustava za siguran rad sa stanovišta zaštite od požara i eksplozija;
- neopravdano i bez potrebe daje znak za požar i bez opravdanog razloga odbija da učestvuje u gašenju požara;
- neodgovorno postupa sa opremom za gašenje požara;
- ostavlja eksplozivne materije i potpaljuje tečnosti i gasove na mjestima koja za to nisu izričito određena;
- ne poštuje uputstva za skladištenje i znakove upozorenja i zabrane.

### IV - MJERE ZAŠTITE OD POŽARA

#### Član 26.

(1) Mjere zaštite od požara u smislu ovog Pravilnika su naročito:

- a) izbor lokacije i dispozicije objekata, kao i izbor materijala, uređaja, instalacija i konstrukcija kojim će se spriječiti ili svesti na najmanju mjeru mogućnost izbijanja i širenja požara;
- b) izgradnja prilaznih puteva i prolaza;
- c) obezbjeđenje potrebnih količina vode i drugih sredstava za gašenje požara;
- d) izbor i održavanje tehnoloških procesa i uređaja kojima se obezbjeđuje sigurnost protiv požara;
- e) zabrana upotrebe otvorene vatre i drugih izvora paljenja u objektima i prostorijama u kojima bi zbog toga moglo doći do požara;
- f) način spasavanja ljudi i materijalnih dobara;
- g) postavljanje uređaja za javljanje, gašenje požara i spriječavanje njegovog širenja, uređaja za mjerenje koncentracije eksplozivnih smješa (gasovi, pare i prašina) i drugih uređaja za kontrolu bezbjednog odvijanja tehnološkog procesa;
- h) održavanje i kontrola ispravnosti uređaja i instalacija čija neispravnost može uticati na nastanak i širenje požara;

#### Član 27.

(1) U planovima zaštite od požara utvrđuje se naročito: procjena ugroženosti od požara, organizacija zaštite od požara, sistem obavještanja, postupak u slučaju požara, tehnička oprema i sredstva za gašenje požara, način snabdjevanja vodom, putevi, prolazi i prilazi, sadejstvo sa

drugim vatrogasnim jedinicama, kao i druge mjere potrebne za uspješno funkcionisanje i unapređivanje zaštite od požara i sprovođenja nadzora nad izvršavanjem mjera zaštite od požara.

### *1. Mjere kod rada i manipulacije sa bocama tehničkih gasova*

#### Član 28.

- (1) Zapaljive materije mogu se držati i uskladištavati samo u objektima koji su za to podešeni ili preuređeni u skladu sa tehničkim i drugim propisima.
- (2) Na ulaznim vratima skladišta opasnih materija mora biti istaknut popis vrsta i maksimalna količina opasnih materija koje se skladište i čuvaju u skladištu.
- (3) Zapaljivim tečnostima, gasovima, eksplozivnim sredstvima i drugim opasnim materijama mogu da rukuju samo punoljetna lica koja imaju odgovarajuću psihičku sposobnost i koja su za to stručno osposobljena.

#### Član 29.

- (1) Pravosudna institucija je dužna da drži u pripravnosti ispravne uređaje, alat i opremu za gašenje požara na mjestima koja su lako pristupačna (podest, hodnik, trijem i sl.), zaštićenim od visokih i niskih temperatura, mehaničkih, hemijskih i drugih oštećenja.

#### Član 30.

- (1) Boce sa acetilenom, kiseonikom, propan-butanom i drugim gasovima, kao i opasne materije i predmeti, mogu se uskladištavati u prostorijama namjenjenim samo za uskladištavanje ovih materija i predmeta, dovoljno hladnim i zaštićenim od sunca i drugih izvora toplote.
- (2) Maksimalno dozvoljena temperatura u skladištima iz stava 1 ovog člana treba da iznosi 22 °C, optimalna relativna vlaga 65-70%, električna i gromobranska instalacija izvedena prema propisima sigurnosti od zapaljenja eksplozivnih smjesa.
- (3) Boce moraju biti zaštićene od dejstva sunčevih zraka

#### Član 31.

- (1) U prostoriji skladišta boca sa tehničkim gasovima je dozvoljen smještaj samo onoliki broj boca, koje se mogu držati u ispravnom stanju u odgovarajućim ležištima.
- (2) U skladištima zapaljivih tečnosti, gasova i predmeta smiju se skladištiti i čuvati samo one vrste i količine materija i predmeta koje su navedene u odobrenju nadležnog ministarstva
- (3) Odvojeno držati boce zapaljivih gasova od boca nezapaljivih gasova, odnosno odvojeno držati prazne i pune boce.
- (4) Boce moraju biti zaštićene od pada pomoću obujmica ili lanaca
- (5) Boce se ne smiju bacati i kotrljati, niti skladištiti i držati u horizontalnom položaju
- (6) Sa bocama se ne smije rukovati masnim rukama i masnim krpama, na bocama se mora nalaziti zaštitna kapa.

#### Član 32.

- (1) Zapaljive tečnosti i gasovi se nabavljaju samo u količinama koje su potrebne za proces normalnog rada pravosudne institucije i prema kapacitetu skladišta i moraju biti skladištene i čuvane na propisan način.



- (2) U užoj zoni skladišta zapaljivih tečnosti i gasova zabranjuje se upotreba otvorenog plamena, alata koji varniči itd.
- (3) Uža zona opasnosti iz prethodnog stava je prostor u kome postoji mogućnost stvaranja smješe para, zapaljivih tečnosti, gasova sa zrakom koja se može zapaliti.
- (4) Zona opasnosti mora se osigurati od pristupa vozila i ostalih uređaja, koja pri radu mogu izazvati iskru ili povećano zagrijavanje ambijenta.

### Član 33.

- (1) Odvijanje tehnološkog procesa u zonama opasnosti, ponašanje zaposlenika i drugih lica u istim, mora biti definisano posebnim radnim uputstvima u kojima će biti navedene sve opasnosti i mjere zaštite od istih
- (2) Granice zone opasnosti kao i njihova posebno opasna mjesta, moraju biti označene posebnim tablama i znakovima sa naznakama opasnosti, upozorenja i zabrana.

### Član 34.

- (1) Objekti u kojima se skladište zapaljive tečnosti gasovi moraju biti snabdjevena uređajima, sredstvima i opremom za gašenje požara i zaštitu od atmosferskog pražnjena.
- (2) Sredstva za gašenje požara u ovim objektima, moraju biti postavljena na lako uočljivim i pristupačnim mjestima.

## *2. Mjere kod rada sa električnim instalacijama*

### Član 35.

- (1) Svi glavni razvodi moraju posjedovati odgovarajuću sklopku za isključenje struje u slučaju požara.
- (2) Ispod glavnog razvoda i većih pomoćnih razvoda postaviti atestiran elektroizolacioni prostirač.
- (3) Svi osigurači moraju imati svoje zaštitno staklo, a topive patrone moraju biti originalne i dimenzionisane prema nominalnoj struji pripadajućeg elektro potrošača.
- (4) Nastavljanje provodnika u razvodnim kutijama i u svjetiljkama mora se izvršiti odgovarajućim vijčanim stezaljkama.
- (5) Na mjestima (u objektima) gdje su instalirani „OG“ instalacije, na uvodima kablova u iste mora se izvesti zaptivanje pomoću odgovarajućeg gita ili gume za zaptivanje.

### Član 36.

- (1) Svaki uočeni kvar na elektro instalacijama i uređajima obavezno je prijaviti nadležnom rukovodiocu.
- (2) Zabranjeno je neovalšetnim i nestručnim zaposlenicima vršiti popravke i bilo kakve intervencije na elektro instalacijama i uređajima a naročito u zonama opasnosti.
- (3) Zabranjeno je proizvoljno izvođenje i popravljanje električnih instalacija i upotreba oštećenih, krpljenih, premoštenih osigurača, neispravnih rasklopnih i drugih aparata.

#### Član 37.

(1) Svi objekti moraju biti zaštićeni od atmosferskog pražnjenja odgovarajućom gromobranskom instalacijom klasične izvedbe

#### Član 38.

(1) U objektima u kojima postoji pojava prašine, obavezno je provoditi i održavati dobro zaptivanje el.razvoda, razvodnih kutija, rasvjetnih tijela i drugih el.uređaja, kao i periodično čišćenje nataložene prašine sa el.instalacijama i uređajima (mehanički ili na drugi način uz dobru ventilaciju).

#### Član 39.

(1) Električne, ventilacione, gasne, naftovodne, toplovodne, gromobranske i druge instalacije i uređaji, kao i dimovodi moraju se postaviti odnosno izvoditi, koristiti i održavati prema propisanim tehničkim normativima i obaveznim standardima kao i uputstvima proizvođača o čemu mora postojati dokumentacija.

(2) Instalacije i uređaji iz prethodnog stava, kao i dimovodi i ložišta mogu se upotrebljavati samo ako su ispravni i ako su pravilno postavljeni.

### *3. Mjere za hidrantske instalacije*

#### Član 40.

(1) Oprema zidnog hidranta mora se stalno držati u metalnom standardnom ormariću, koji je označen oznakom za hidrant slovom „H“

(2) U blizini zidnog hidranta (do 1,0 m) zabranjeno je držati bilo kakav materijal, a prilaz hidrantima mora uvijek biti slobodan.

(3) Hidrantska mreža sa svim uređajima i armaturom, mora se pregledati i kontrolisati najmanje jedan put u periodu od najmanje jednu godinu, od strane određenih stručnih lica (pravno lice ili preduzetnik koji je registrovan za tu djelatnost)

(4) Za vrijeme periodičnog pregleda, mora se izvršiti kontrola pritiska i protoka na hidrantima, pregled funkcionalnosti ventila i uređaja, pregledcrijeva u ormarićima, koja se moraju odmah i detaljno pregledati i oštećene zaptivke na spojkama zamijeniti

(5) Poslije korišćenja, hidrantska crijeva se moraju dobro oprati, osušiti, pravilno namotati i ostaviti u ormariće

(6) Svi ventili na cjevovodu, koji povezuju hidrantsku mrežu sa izvorom vode, moraju biti ispravni i na njima ne smije biti propuštanja vode.

#### Član 41.

(1) Ako se u toku kontrole utvrdi da pojedini hidranti, ventili i drugi elementi nisu ispravni i funkcionalni, moraju se odmah osposobiti ili zamijeniti ispravnim

(2) O periodičnoj kontroli instalacije i uređaja mora se voditi odgovarajuća evidencija

(3) Svaki zaposlenik mora biti upoznat sa položajem hidranata (u objektu gdje radi) i pravilnom upotrebom istih

(4) Spoljni hidranti moraju biti na vidan način obilježeni tablicama sa upisanim rastojanjem koje se postavljaju na najbliže objekte ili na posebne stubove

- (5) U neposrednoj blizini spoljnih hidrantskih priključaka treba držati ormare sa ispravnom opremom ( crijeva, mlaznice, hid.nastavak i ključ)
- (6) Strogo je zabranjena upotreba hidrantskih instalacija i opreme u druge svhre o čemu se mora stalno voditi računa.

#### *4. Mjere za protivpožarne aparate*

##### Član 42.

- (1) Vatrogasni aparati i ostala sredstva za gašenje požara moraju se uvijek držati u ispravnom stanju i moraju biti vidno označeni i pristupačni sa svih strana. Prostor oko ovih uređaja i pristupni put istim mora biti slobodan, a njegova širina ne smije biti manja od 0,80 m.
- (2) Pravosudna institucija će obezbjediti sledeća sredstva za gašenje požara:
- ispred svake razvodne baterije u objektu pravosudne institucije treba postaviti po jedan aparat za gašenje požara punjen CO<sub>2</sub> gasom, sadržaj sredstva minimalno 9 kg ili aparat punjen lakim suvim prahom sadržaj sredstva minimalno 9 kg (S-9).
  - u svim radnim prostorijama, hodnicima, pomoćnim prostorijama isl. treba postaviti aparate punjene lakim suvim prahom - sadržaj sredstva minimalno 9 kg (S-9)
- (3) Vatrogasni aparati moraju se pregledati i kontrolisati najmanje jedan put u periodu od najmanje jednu godinu, od strane određenih stručnih lica (pravno lice ili preduzetnik koji je registrovan za tu djelatnost)

#### *5. Mjere u administrativnim prostorijama*

##### Član 43.

- (1) U administrativnim i pomoćnim prostorijama moraju se primjenjivati naročito sledeće mjere zaštite od požara:
1. Stavljanje opušaka od cigareta i šibica smije se vršiti samo u posebno, za tu svrhu namjenjene limene posude sa poklopcem,
  2. Odbačeni papir i ostali zapaljivi materijali ne smiju se baciti u istu posudu sa opušcima,
  3. Čišćenje podova u radnim prostorijama ne smije se vršiti zapaljivim tečnostima;
  4. U radnim prostorijama zabranjena je upotreba električnih uređaja kao što su rešo, električne grijalice i sl.

##### Član 44.

- (1) Po završetku radnog vremena na administrativnim i pomoćnim prostorijama provode se naročito sledeće mjere zaštite od požara:
1. Isključuje se svi električni potrošači (električne pisaaće i računarske mašine i mašine za automatsku obradu podataka),
  2. Opuške i drugi otpadni materijal iznosi se izvan radnih prostorija i smješta u određene posude.

## 6. Opšte mjere

### Član 45.

(1) Putevi, prilazi i prolazi moraju biti slobodni za nesmetan prolaz i eventualnu intervenciju i moraju biti na odgovarajući način označeni i slobodni od stvari koje bi mogle otežati preduzimanje mjera gašenja požara ili spašavanje imovine i ljudi.

### Član 46.

(1) Pravosudna institucija je obavezna držati u pripravnosti odgovarajuće sprave, alate i druga sredstva za početno gašenje požara kao i vršiti redovnu kontrolu istih prema uputama proizvođača odnosno standardima.

### Član 47.

(1) Kao sprave za početno gašenje požara u smislu prethodnog člana smatraju se sve vrste vatrogasnih aparata kao što su: aparati za vodu, hemijsku pjenu, suho gašenje ili ugljen-dioksid i drugi odobreni aparati kao i priručna sredstva i oprema za gašenje požara, kao što su posude sa vodom, posude sa suhim pijeskom, alati itd.

## V - OBUKA ZAPOSLENIKA O OPASNOSTIMA I MJERAMA ZAŠTITE OD POŽARA

### Član 48.

(1) Pravosudna institucija je dužna da obezbjedi da se svaki zaposlenik, prema posebno utvrđenom programu, upozna sa opasnostima od požara vezanim za poslove i zadatke na koje je raspoređen, kao i sa mjerama i sredstvima za gašenje požara, praktičnom upotrebom priručnih aparata, uređaja i opreme i sredstava za gašenje požara i sa materijalnom i drugom odgovornošću zbog nepridržavanja propisanih mjera zaštite od požara.

(2) Pravosudna institucija je dužna da najmanje jedanput godišnje vrše provjeru znanja zaposlenika iz prethodnog stava o čemu mora postojati dokumentacija.

### Član 49.

(1) Prilikom stupanja zaposlenika na rad, odnosno prije njegovog raspoređivanja, kao i u slučaju raspoređivanja zaposlenika sa jednog radnog mjesta na drugo radno mjesto na kojem su promjenjeni uslovi rada, opasnosti i mjere zaštite od požara, pravosudna institucija je dužna upoznati zaposlenika sa opasnostima i mjerama zaštite od požara, odnosno sa praktičnim rukovanjem aparatima i sredstvima za gašenje požara vezanim za radna mjesta na koja se raspoređuju.

### Član 50.

(1) U cilju obučavanja zaposlenika sa opasnostima, mjerama i sredstvima zaštite od požara, odnosno sa praktičnom primjenom aparata i sredstava za gašenje požara, pravosudna institucija je dužna donijeti plan i program obuke, te propisati način provjere znanja zaposlenika.

#### Član 51.

(1) Provjeru znanja zaposlenika iz oblasti zaštite od požara, kao i praktično rukovanje sa aparatima i sredstvima za gašenje požara, pravosudna institucija je dužna vršiti najmanje jedanput godišnje, o čemu mora postojati odgovarajuća dokumentacija.

#### Član 52.

(1) O izvršenoj obuci i provjeri znanja iz prethodnog člana ovog Pravilnika, mora se voditi odgovarajuća evidencija koja sadrži:

- datum vršenja obuke, odnosno provjere znanja;
- ime i prezime lica, odnosno naziv organizacije koja je vršila provjeru znanja iz oblasti zaštite od požara;
- osnovne podatke o licima koja su pristupila obuci, odnosno provjeri znanja, kao i način provjere znanja;
- podatke o pokazanom znanju prilikom vršenja obuke, odnosno provjere iz oblasti zaštite od požara;
- Zaposlenik koji ne pokaže odgovarajuće znanje biće upućen na ponovnu obuku i provjeru znanja iz oblasti zaštite od požara.

#### Član 53.

(1) Upoznavanje i obučavanje zaposlenika sa opasnostima i mjerama zaštite, kao i sredstvima zaštite od požara, odnosno sa praktičnom upotrebom aparata i sredstava za gašenje požara vrši se na pogodan način, kao:

- organizovanje seminara, kurseva, predavanja, prikazivanje filmova i slično,
- izdavanje skripti i brošura,
- organizovanje demonstracija i praktične upotrebe vatrogasnih aparata i drugih sredstava insceniranjem požara.

### VI - VRSTA I KOLIČINA OPREME I SREDSTAVA ZA GAŠENJE POŽARA, RASPORED OPREME I SREDSTAVA I VRIJEME POVREMENOG ISPITIVANJA NJIHOVE ISPRAVNOSTI

#### Član 54.

(1) Pravosudna institucija obezbjeđuje redovnu kontrolu ispravnosti ručnih i prevoznih aparata za gašenje početnog požara, kao i hidrantske mreže, prema uputstvu proizvođača, odnosno prema utvrđenim standardima.

(2) Kontrolu ispravnosti vatrogasnih aparata za gašenje početnih požara kao i kontrola ispravnosti hidrantske mreže, mjerenje pritiska hidrantske mreže, kontrola opremljenosti i kompletiranosti hidrantskih ormara vrši se u periodičnom razmaku od jedne godine.

(3) Kontrolu ispravnosti i ispitivanje aparata iz stava 2. ovog člana, koji se nalaze u prometu i upotrebi, može da vrši pravno lice ili preduzetnik koji je registrovan za tu djelatnost ili organizovani servis za kontrolu vatrogasnih aparata u okviru organa javne uprave ili javne ustanove koji imaju odgovarajuću tehničku upremu, poslovni prostor i stručne radnike i koji za to dobije odobrenje od nadležnih organa

(4) Na vatrogasnim aparatima moraju postojati etikete servisne radionice iz kojih će se vidjeti kada su kontrolisani, datum sljedeće kontrole, potpis lica koje je izvršilo kontrolu i ovjeru pečatom.

(5) O svemu navedenom u ovom članu, pravosudna institucija vodi posebnu evidenciju koja se sastoji od knjige evidencije kontrolisanih aparata, zapisnik o kontroli aparata, zapisnik o mjerenju pritiska i kontroli hidranstske mreže i karticu ili dogovarajuću naljepnicu sa potrebnim podacima koja se postavlja neposredno na aparat.

#### Član 55.

(1) Do donošenja Plana zaštite od požara pravosudna institucija će obezbjediti sledeća sredstva za gašenje požara:

(a) ispred svake razvodne baterije u objektu pravosudne institucije postaviće se po jedan aparat za gašenje požara punjen CO<sub>2</sub> gasom, sadržaj sredstva minimalno 9 kg ili aparat punjen lakim suvim prahom sadržaj sredstva minimalno 9 kg (S-9).

(b) u svim radnim prostorijama, hodnicima, pomoćnim prostorijama isl. postavlja se po jedan aparat punjen lakim suvim prahom sadržaj sredstva minimalno 9 kg (S-9)

(c) u prostoru kotlovnice minimalno 2 komada aparata za gašenje požara punjen CO<sub>2</sub> gasom, sadržaj sredstva minimalno 9 kg ili lakim suvim prahom sadržaj sredstva minimalno 9 kg (S-9).

#### Član 56.

(1) Vatrogasni aparati i ostala sredstva za gašenje požara moraju se uvijek držati u ispravnom stanju i moraju biti vidno označeni i pristupačni sa svih strana. Prostor oko ovih uređaja i pristupni put istim mora biti slobodan, a njegova širina ne smije biti manja od 0,80 m.

#### Član 57.

(1) U zimskom periodu hidranti, posude sa vodom za gašenje požara, moraju biti zaštićeni od smrzavanja.

#### Član 58.

(1) Vatrogasna oprema kojom raspolaže pravosudna institucija, može se koristiti samo za obuku, gašenje požara i otklanjanje posljedica elementarnih nepogoda.

(2) Potrebne sprave, alate i opremu za gašenje požara nabavlja pravosudna institucija u skladu sa potrebama zaštite od požara.

### VII – NADZOR NAD SPROVOĐENJEM MJERA ZAŠTITE OD POŽARA

#### Član 59.

(1) Inspeksijski nadzor nad provođenjem mjera zaštite od požara propisanih ovim Pravilnikom, Zakonom o zaštiti od požara Brčko distrikt BiH i planom zaštite od požara, kao i nad provođenjem propisa o tehničkim normativima u pogledu zaštite od požara, vrši inspektor za zaštitu od požara.

## VIII - PRELAZNE I ZAVRŠNE ODREDBE

### Član 60.

(1) Za sva prava, dužnosti i odgovornosti zaposlenika iz oblasti zaštite od požara koji nisu regulisani ovim Pravilnikom važe odredbe drugih opštih akata pravosudne institucije i odredbe Zakona o zaštiti od požara i Tehničkih propisa iz oblasti zaštite od požara.

### Član 61.

(1) Izmjene i dopune ovog Pravilnika vrše se po postupku za njegovo donošenje.

### Član 62.

(1) Ovaj pravilnik stupa na snagu danom donošenja, a objaviće se u „Službenom glasniku Brčko distrikta BiH“.

PREDSJEDNIK  
PRAVOSUDNE KOMISIJE

Safet Pizović